

巢經巢全集

第一函
第九冊

屈盧詩稿卷一

遵義 鄭知同 伯更

古今詩共七十五首 己酉 訖 己巳

大暑行

金盤湧上扶桑杪天雞忽唱雲中曉我欲驂鸞復御龍空中衣袂天風繞騰虛
蕩蕩入天門力拒黃人轉蒼昊鼓刀奮迅殺蒼鵠一快炎蒸盡揮掃却念天人
隔眇茫天公威令誰能矯不能避暑廣寒宮流金炎景催人老紙屏石枕視夏
朋石鼎甌鑪誠至寶黑甜鄉好祇益倦蜜汁茶甘愈增懊琥珀冰盤不納涼蒲
葵大扇空煩擾汗流如雨不能揮日夜驅蚊復捕蚤披襟向陰陰亦炎赤腳覓
泉泉已少土囊杜口不生風白日不動蒼天小安得驪龍領下珠重淵酣睡當
胸抱銀漢無波誰復知咸池水涸應難保蟠桃何日更開花若木難禁枯復槁
卻羨六龍不畏曬回車宛轉奔黃道何當青海起伏龍掀駕雷公頃刻到快哉

風雨拂鬱攸無令旱魃久相紱

己酉歲九月九日追和靖節先生原韻

有節患無菊有菊患寡交花開客亦滿無酒興復凋三者此全具足以壯登高
今載靖節載餘滓仍澄霄歷久復有今可辭終日勞壺傾百杯釀麥熟雨甕焦
黃昏醉飽後得句何陶陶雖無南村詩亦足樂今朝

於堰南穫早稻

濁富不足貴清貧亦殊難終年勉畜事不足供饑寒新穀未登場斗儲先已單
堰南一畦稻所資繼朝餐歲計喜先熟庶無憂一簞晨興度阡陌父老慶有年
吁嗟誠有年手足胼復胼不見樹藝同飢飽存其間衣食信如此人功能奪天
吾儕自耕食況乃性分然誰不事經營而能求自安

編籬

疎籬短短對南山小圃秋深日往還野趣回環三徑老西風收拾一圍關幾聲

落葉敲霜冷盡夜鳴蜩弔菊寒載酒三更歸未得露深猶自繞苔斑

秋陰

層陰迢遞接空濛無限秋懷倚碧桐蕭瑟山川猿嘯裏蒼茫物色雁聲中平原木脫雲無影曠野天低水偪空試上松崖舒遠眺淡煙衰柳正西風

釜然并序

釜底常有墨厚分許烟所成也積久觸微火乃然暴火則否俗以兆晴居校官久雨偶於霽後見之已而果晴

山城苦雨浹旬日生柴積煙釜生墨晨炊餘火觸臍然初如幾點疥癬跡金蛇盤互逐節伸火輪宛轉趨風急中間一塔尙昏黑白蟻成陣爭行出滿天星宿散囊螢布地黃金走沙磧縱橫散漫奇罕匹過眼霏霏隨變滅勢盡延緣作絃絢春蚓穿沙肆紆屈明朝餘渣盡澄霄物理感通誰盡悉到君十日只望晴笑指乾鍋勝龜坼

遊石碧崖登上亭

在鎮遠府治對岸

巖上撐孤亭亭上懸蒼巖敞瘦柏作檻縷絡藤爲簾怪石如蟠蚪鱗鱗森巉巖
仰視何玲瓏縹緲透誰鐫鑿飛臺壓晴波突兀空際黏我來緣髮徑曲折隨留淹
上上恣窮攬青壁前忽覘攀扶倚楹柱恍立秋毫尖喘息定驚魂放膽舒眺瞻
雪霽天宇明山水相澄涵城郭接原野一碧低橫嵐石屏獨巍聳迴秀凌空添
湫水鑿崖足湍瀨停爲潭鷗鷺曬圓沙漁子歌半酣奔流割崖去拍浪拋輕帆
風掀一闕聲忽若潮來滄市塵來去人行螳相聯銜營馬散平林戢戢食葉蠶
勝景此超絕餘觀俱退謙暝色催返棹戀戀情未厭買次數月塵快洗泥一枚

月夜

獨步林塘下纖雲四捲空松多暹受月柳瘦不牽風人意清如許天光澹與同
夜深歸未得霜氣下樓東

晚步

雨後輕泥溼行吟出米溪日分峯向背竹暝水東西任意移芳躅隨風返故蹊
聞農無一事三五話寒畦

山中梅開

冬日適將半梅梢未點妝纔經一夜雪開得半橫塘流水春無迹空山月暗香
墓門應自此花事漸添長

梅花絕句四首

安排竹屋看橫斜底事纔生幾點花莫是昭君魂未返瓊環月下滯胡沙
嶺上冰魂無斷絕纔從雪後弄幽光天寒翠袖捲日暮一笑巡檐點淡妝
一杯酴醾綠伴黃昏妙意凝神不可言踏遍羅浮深夜雪一叢花下一詩人
風雪精神正此時不知百卉竟何之逐春能得幾時好桃李而今知未知

夜讀

萬籟宵分寂貪書引興長齋心醫鈍藥宿讀饋貧糧
眼鑿懸蟹神昏芋作羊

雕蟲何足貴學海望汪洋

竹下偶成

石上有小亭亭北有紫竹稀疏十數竿映帶一庭綠柿葉久無陰桑枝復已禿
冬日小亭上賴此寫心曲密葉亂無數秀色濃可掬蕭瀝動微風徒倚託芳躅
時時彈素琴因之酌酈綠緬懷嵇阮徒長嘯振崖谷景物但適性容膝詎爲促

晚眺前林

山山收暝色嵐翠壓松筠返牧兒童樂歸巢鳥雀馴雪殘疑有鶴樹遠望如人
清景應須畫誰堪與細論

如達小女次義山衮師詩韻

正朔生絳老初度已寡匹重瞳肇膺圖機衡齊政七良時適及子寢地曉寒栗
喜見一代孫汝乃首出物廬墓遷居來添丁纔第一得數並得先詎不稱貴骨
煦嫗未周碎威怒成健質慈母飯逃子少姑眠倦姪反側不着懷那顧漲乳溢

貪華朝暮啼風雨或難出園林日抱翔生摘巧果實非親挽不去屹立等圭笏
阿翁寧鄙綠吟喁便欲吃倒身向阿婆驕氣倍怙慄扱衽着短後學步恣衝突
爭逐羣幼隊昂藏似鷹鷂牙牙初作語入聽得仿佛向人索弄物甘言已如蜜
稍長益明熾姿度無可疾兩臂光若藕冰玉色俱失兩足白勝雪不喜着背成
齒清絜素比面粲蕙芳律長眉同掃妝青眸類點漆家人喜穎秀旦晝轉加膝
乃祖特鍾愛物物任其乞曲意揣所歡百計度一日聰明遂速啓情態不可筆
汝姑生昔年家窘尙傳述炊麥雜飛蠱舂麻撮狗蝨鉛弄得溪魚供餐不去乙
黃雞絕產卵冬日便無術貧賤養兒女艱苦難記悉汝今需百味任意了無悖
葷腥每佐飯祇慮厚釀疾似此當速成勿使眼穿穴中郎誠有女應付青箱帙

觀舞猴

禽獸亂人羣薄習何代垂世顧樂異物不復思其宜我覩睢盱態有枝將何施
正以醜見巧俳優娛衆兒旣着項羽冠更衣周公衣假面戲侏儒烏龍從指麾

居然袁公術木兵臨陣奇忽作猴夫人妖豔扶婁姿頃復着緋袍供奉端容儀
太息楊千度矯輮物性離野賓曾記否山中吟嘯時幾日落機網虛幻從人爲
但恐面目改衆狙驚見疑

懷趙二珊廷璜姊婿

分襟何草草別後思已遲平居少交際獨子爲相知踰歲始集郡暫復傷別離
勿謂前期易少壯能幾時木落空山寒鎮日無言辭嗟余寡兄弟手足長如遺
心交更久闊難勝寥寂思預計元日後珠鐙紅萬枝景貺斯時來倡和吟春思
蘇子雖畏酒尙非坐窮詩君醉我解詠壺盡還謀妻

山中卽事

冬餘成就石林蟠更向新池起小巒地僻獨嫌春到緩居深未覺雪侵寒
先便明年摘種竹纔添一處看眼底盤中俱自適一吟一度倚闌干

晚飯

杜老子魚嗟莫辨髯翁薦菰得非難肯嫌晶飯常供飽可想貧家尙絕餐陶令
飢驅憐更乞庾郎貧慣卻能安蒸豚人乳教神泣何似齏鹽得自完

月夜

倦坐褰帷出微颺拂面輕泉穿幽徑咽月躡薄雲行妙境誰曾覺長空似箇清
瓊樓高極處果否有寒生

次夜月

風動戰菰蒲清光滿一湖雲輕機散錦星落浦還珠夜靜收羣動天空有一吾
鼯聲方飽臥輪爾惡抵奴

晚歸

水輪聲涸霜氣高磊落石出魚歸濠行人晚度喬木底潭古陰陰生豎毛草樹
谿頭出岑寂誰家犬吠東林梢微漸瀾瀾送歸路孤煙斷續瞻衡茅山中小弟
聞與杖屨短且令勤焚膏

春晴

簾捲柳陰堂雲山四望蒼高風搏隼翼旭日暈波光冰雪寒將盡陽和候漸長
皇心回澤早萬象總懷芳

溪行

典徑曾經處晴遊興轉奢鴛鴦眠渚靜翡翠點波斜石溜聽餘滴人烟見幾家
谿山行欲盡何處是梅花

十五月夜

青天一紙輕如浮鋪在雲端長不收女媧鍊石補未到炯然一穴當空留回頭
驚覺是明月清輝已上三重樓香塵步步生羅襪滿地光華如水流咫尺人天
不相隔余懷渺渺知何適恍如置我滄溟中萬頃波濤皆靜息驪龍吐出玻璃
珠瓜上分明探不得移時兀坐斗亭上涼風裊裊生虛白天漿貯滿玉壺中灑
落人間皆露滴脫絮帽發浩歌可樂不樂當奈何人生少壯豈易得况復明月

今宵多月今酌爾一杯酒似爾清淨之身能得否

醉司命三首

爆聲初過紙灰紅盡夜家家祀竈公老婦真堪爲衆母聾君端合作家瓶盆入
爨餘周禮糟粕塗門尙楚風兒女向魘羅跪拜祇求無過不言功

都竈騷除棗栗新少君無術亦通神聰明不用多辭媚善惡惟應一歲陳懸釜
無炊焉鬼瞰尸饗有罪奈家貧啗啗續祝真何說可笑鄰翁欲腐脣

搖紅燭影鬱金香候欲朝天夜未央焚尾儘須傾綠蠟爛頭獨愧少黃羊邀鄰
恰似孫臏祭坐竈從無向相狂擬待辛盤嘉味釘迎來柏葉更飛觥

上元日諸舅侍外祖過子午山會飲大人有詩紀事命次韻作

持杖將車季與元笑扶紅帶碧山前焚魚快主傳相會稱兕慚非截竹年滿坐
德星排玉李幾人思遇撒金蓮擬聽三鼓崐崙破鐵鎖銀花且漫然

時粵寇未平

詠鷺鷥

青田盡作還丹使休怪絲禽不與俱自是胎仙留別種人間清品可能無

倦而作

白年一湯客萬事徒勞勞流水去無極孤雲閒自高世兒誇疾走吾輩獨何遭
投筆軒然起熒熒撫佩刀

如達女痘瘍於除夕前一日哭之

襁負連朝犯雪花艱難轉徙更無加不緣脫命甯攜汝還望歸山竟捨爺惡疾
無端摧玉骨殘魂莫便逐風沙早知入劫逃難免總死何須定去家

阿厖兒又痘瘍於上元前一日哭之

半載兒生夢幻中依然木篋付城東得無藥誤將誰怨終是時乖訝許窮泉路
不孤應識姊天涯缺望獨憐翁祖塋他日能歸骨拚汝雙骸地一弓

春草感懷

療原猶憶接天紅轉眼濃青逐暖風刳火未埋蕭艾燼春光空汎蕙蘭叢獨憐

幽谷沈香藹忍上燕城對鬱葱仲蔚廬荒人不見那堪搔首憶盤中

李佗尊鎮故人見訪

念昔濠陽縞紵初爲余相就伴居諸那堪風雨連年別况少雲山一紙書人事
感今同見舛時艱知更極何如重勞訪我塵埃裏哽咽難言淚染裾

贈畢俊民

用彰

世上男兒爭附和如君卓識豈平平觀書志大遺章句落筆求真見性情樗散
自慚長守拙英多堪羨駐蜚聲相從朝暮已成慣閒聽宮商不記名

俊民
善琴

贈別尹訓三

作書三首

文會來千里前緣似有由異鄉同作客傾蓋便爲傳詩卷徐出情詞一一抽
儒修期遠大家學道真求

朝夕頻相過披肝見素誠知君真擇友事我竟如兄曲學慚非助無言聽不傾
豈徒冠玉美心迹有餘清

避寇艱難出窮途喪兩孩庭闈無一慰姊妹又雙回色奉虞吾薄衰顏俟子開
臨歧須共勉莫便沒塵埃

避亂紀事贈別二珊姊壻八十韻

甲寅八月朔羣盜掘桐仁婁山失要隘寇禍延於世萬夫守雷臺蠶食四境民
行及我里閭大人思走勻無術保桑梓失去誰得論卻慮失民望况乃偏歲寒
道復阻且長播遷愁苦辛君忽隻身來爲言叵因循不幸罹危難上節重辱身
戰守無可恃團練空雲屯見幾不俟日那容再逡巡賊來如驅羊害至徒俱焚
翁今况就祿正藉逃妖氛國家久承平民不知從軍吾力不能出計惟附族姻
有叔走黃平將母去烏蠻妻兒當累翁相攜共風塵童顛父與伯不知更何奔
但獲首領全那顧骨肉分翁家走勻路取直經雲門稍旋自吾里可辭紆道艱
可奈挾羣幼冒險羊巖津吁嗟計已熟迫切來痛陳聽罷仰天歎欲語聲先吞
拔脫虎豹場可免崎嶇患嗒然共攜手上堂啓尊顏再拜淚如雨具述委與原

寒鐙定行策翻身君卽還山堂沸如湯行李粗繯完筍籃舁二人妻妹同衝寒

丁弟共我步

丁小衛妹
在堂

行行兩河灘近賊十餘里鄉團蜂蟻攢舟師早停渡斷

岸勝盤桓殷勤告團長逼仄踰巨川月黑趨君家膽縮如臨淵君母去不諧且

將甥姊前相送君益悲午飯章王村更商還奉親我待兩曉嘯篋來急如飛恍

若重生歡明旦渡湄水

即羊
巖

駭絕非等倫渾落萬丈底不敢窺縮根兩壁一線

逕入地還升天旌旗晃煙樹成堞盤雲關緣崖列梟首穢惡逾腥羶戰戰出鬼

窟那堪回再觀膽舒卽前路高下投巒煙北風朝怒號老幼各凍皴數里輒小

憩得火環就溫行者借勞爇漸苦精力屏陟阪相挽推並路時凭肩足力日不

支更癡生胝癢亭午問宿處往往卅里賢縮地旣無術安得施羽翰眼穿忽指

至急如驥奔泉入戶安上下無暇問盤餐救渴七盃茶伸足臥草菅倦起甫飢

覺送飯如餽餽終夜那反側殭死曉共嫋開門是何處惟看山復山抵勻十五

日回首成經年無錢僦廣宅低首耆校官朽腐更狹陋廿口居三間補葺置几

榻撐拄身不旋草草辦食具釜甌依賴垣姻家宦囊薄相貸時覺慳蹇殮遂枯
据仰屋時浩歎有蔬或無米有水常少薪食頃一興聚匙箸交相翻轉臂已狼
籍不飽空相看數促已至此天禍仍未竣半月殤兩孩五情皆塞填乃祖失掌
珠悲愴來無邊子婦詎敢哀言笑強慰安所幸兩雛甥怡情猶後先姊妹亦雙
雙左右娛晨昏忽聞掃挽槍速歸丁與君整駕各望家勢無容更端嗟嗟二珊
子別矣聽一言生死自命定困窮原偶然從古有離合何得不散筵所悲諸苦
并能無摧肺肝流離自今始艱厄知尙纏還家速安置日望同征鞭揮淚恍如

夢麤言遂成篇

真先諸韻通押祖
彭衡行也自記

獨坐感懷

一院深愁晴雨天寂寥官署冷炊煙但傳梓里仍戎馬不得家書已半年

南丹道中

流水小橋西復東獨騎驚馬趁秋風愁人不帶看山眼况是漫瀰煙雨中